

Expertonan di Wikima Aruba Partners poniendo e base pa e Plan Integral y Strategico Nacional

Arubianonan no ta apatico; nan ta cla pa expresa nan pensamiento kico nan kier cu Aruba

Un proceso di comunicacion y combersacion lo por trece cambio politico

ORANJESTAD—Ta crucial pa mas hende ta involvi den e proceso pa yega na un Plan Integral y Strategico pa Aruba, NISP, y esaki ta e trabou tambe di Wikima Partners Aruba. Despues di a duna cursonan preparatorio pa crea facilitadonan entre e personal di Direccion di Asuntunan Economico, Comercio y Industria y Direccion di Turismo, a expande e ‘mensahe’ na un grupo mas grandi. Recientemente, creador di e compania Britanico Wikima Romy Shovelton, hunto cu socio Robyn McCullogh tabata na Universidad di Aruba pa dirigi un semario na un grupo mas grandi di ehecutivonan local cu ta cla pa duna nan contribucion pa realizacion di e Plan Integral y Strategico Nacional.

Ta trata di hendenan cu ta custumbra di atende seminarionan, pero segun Shovelton na Bon Dia Aruba, e enfoque di Wikima no ta pa siña e participantenan algo, sino pa saca e miho for di nan, laga nan mes reconece cierto actitudnan cu ta contribui na miho comunicacion. Y comunicacion ta esencial pa por logra involvi henter comunidad den creacion di un plan cu ta dileña e direccion cu kier pa Aruba bai.

Arubiano mester determina rumbo di Aruba

Y e actitud di esnan cu lo facilita e combersacionnan den comunidad, cu diferente grupo mester ta uno cu ta permiti un participacion activo, Shovelton a bisa Bon Dia Aruba. “E hendenan mes mester pensa kico nan kier, ki futuro nan kier. Locual nos ta trece aden ta nos conocimiento y experencia den con pa yuda hende tene e combersacionnan cu nan mester tene.”

E combersacionnan mester ta basa riba un metodologia unda e base ta aprecio pa otro. “Nos acercamento ta pa busca e miho di tur cos, y traha riba esei, enbez di mira locual ta robez. Den e sentido ei, nos ta hiba e participantenan den un fase unda nan mes ta reconece kico ta traha miho y saca lo miho di un situacion.”

E peticion di Aruba, pa medio di Direccion di Asuntunan Economico, Comercio y Industria na Wikima tabata pa mira con por logra un participacion mas grandi di comunidad den formulacion di NISP. “Tin hopi estudio, investigacion tecnico, pero nunca a inclui e stem di comunidad den e plannan aki,” Martin Hazell, otro socio di Wikima encarga cu e proyecto di NISP, a bisa.

Un boca bisa otro

Y no ta Wikima cu lo percura pa e combersacionnan cu gruponan den comunidad, por ehempel studiantenan, amanan di cas, trahadonan, te hasta stranheronan cu ta residencia na Aruba. Ta propio facilitadonan local lo dirigi e encuentronan, y esei ta e responsabilidad di Wikima, esta pa percura cu e facilitadonan local tin e habilidad y stamina necesario pa guia gruponan den combersacionnan productivo y positivo. Y esaki ta bien posibel den e 18 lunanan cu tin pa produci e NISP, apesar e tarea ta muestra hopi, esta di involvi miles y miles di hende local den combersacion pa determina e forma con mester determina e direccion pa Aruba. “Si nos ta train 10 persona, cu riba nan turno ta pasa e mensahe y actitud pa otro 10 persona, y ta sigui asina, bo lo keda sorprendi con lihe ta yega combersacionnan cu gruponan mas grandi,” Martin Hazell a bisa.

Hazell a traha cu companianan grandi, incluso multinacionalnan cu mas di miyon empleadonan rond mundo. Hunto a logra crea un vision comun, apesar di diferencia den sexo, raza y cultura. “Si hendenan ta sincero y kier ta forma parti di e organizacion, nan ta duna nan parti. Si hendenan no kier forma parti di Aruba, nan lo no ta biba na Aruba tampoco.”

Arubianonan ta cla pa bisa nan opinion

Romy Shovelton a bisa cu den e dianan cu nan a pasa na Aruba (unda nan a recore e isla, combersa cu ciudadanonan comun, goza di carnaval hunto cu e comunidad y envolvi nan mes den mas actividad local), nan a ripara cu tin un interes grandi di hende pa ta envolvi den desaroyo di Aruba. “Nan kier tin algo di bisa,” Shovelton ta sinti. “No tin ningun persona, sea ta e taxista, e persona cu ta traha na botica, of ta bende cuminda, cu no a bisa nos cu nan kier pa nos bin papia cu nan. Fundamentalmente, tur hende ta interesa den nan mesun futuro.”

Tin hopi keho na Aruba cu e Arubiano a tuma un posicion apatico, y ta laga otronan, sea ta Gobierno of otro grupo, tuma decisionnan p’e, sin cu e ta demanda pa laga scucha su stem. E socionan di Wikima no ta kere cu esaki ta e caso. Al contrario, na momento di combersa cu localnan y puntra nan opinion, e reaccion tabata grandi, y hendenan tabata cla pa expresa nan mes. Segun Robyn McCulloch, “es mas, asina cu nos cuminza papia, hendenan ta bisa nos kico nan vision ta pa Aruba. Nan ta bisa kico nan lo kier mira pasa na Aruba. Ora cu mishi e base di locual hendenan kier pa nan mes, y e isla, y nan tin e oportunidad pa papia di locual nan ta sinti, ta manera e hendenan mes ta corda kico nan kier en realidad. Y e momento ei, nan ta cuminza tuma accion.”

Un miho Aruba

Hopi di esnan cu e socionan di Wikima a papia cu n’e a expresa di kier un ‘Miho Aruba.’ “No ta cuestion cu cos ta malo awor aki,” Romy Shovelton a bisa. “Pero, hendenan ta sinti cu e situacion por ta miho.” Y e meta di Wikima ta pa determina kico berdad locual hendenan ta considera cu mester mehora, sea ta e situacion financiero (personal), trafico, vivienda, of bida social.

Participacion comunitario por trece cambio politico

E meta di ‘combersacionnan den comunidad’ no ta politico. Pero, e por trece cambionan politico si, pa motibo cu hendenan ta mas envolvi. “Esei no ta algo cu nos (Wikima) ta haci. Corda cu politiconan ta sali di e mesun comunidad unda nan ta biba,” Martin Hazell a splica. Asina cu hendenan ta participa na e proceso di pensa riba direccion di cualkier organizacion of pais, nan ta ‘forsa’ politiconan tambe pa sigui e proceso.

No ta cuestion di reuni cu miles di hende pa yega na un solo pensamiento. E meta di NISP ta pa yega na un estructura unda hendenan por contribui cu nan opinionnan y sugerencianan pa medio di un sistema cu mester continua, te hasta ora cu ta cla cu e plan. E ta mas bien un sistema cu mester percura cu semper tin comunicacion entre diferente sector pa sigui tuma e pasonan na interes comun. Robyn McCulloch ta bisa cu e importancia ta pa saca afo ideanan y sugerencianan, y despues determina (hunto) e prioridadnan y e forma con lo ehecuta e ideanan. “Mester pensa riba un tapijt cu tin patronchinan compleho y colorido. Asina mester mira e proceso, esta unda un cantidad di person a contribui na nan ideanan.”

Plan Strategico pa anda cu un mundo insigur

Martin Hazell ta sigura cu e NISP lo no ta un raport, pero mas bien un plan strategico. Organizacionnan of den e caso aki, Aruba, mester ta ekipa con pa anda cu factornan cu ta insigur. No por tin un raport cu ta describi ki paso mester den tur situacion, ya cu no por premira situacionnan (Aruba no lo por a premira e caso Holloway). Pero, pa por confronta retonan asina, mester ta ekipa cu e tecnicanan necesario, cu ta duna e flexibilidad pa yega na solucionnan. “Un

plan ta muestra unda lo kier bai, y con pa actua ora cu ta drenta un area desconoci. Tin asina hopi inseguridad, manera economia mundial, 'global warming,' y otro. No por traha un plan pa 25 aña cu ta mara na aspectonan specifico, sino cu ta duna direccion kico lo por kier e futuro lo ta.” Y den e proceso aki, Arubianonan por (re) descubri kico ta e balornan, kico ta e creencia di y como pais. Y kizas mas importante, den e proceso Arubianonan lo siña con pa papia y comunica (miho) cu otro. Di e forma aki Aruba por bira realmente un 'One Happy, Talking Island.'

Public14wikima